

- प्रधानमंत्री नरेन्द्र मोदी रो आज कनाडा मांय जी-7 शिखर सम्मेलन मांय सिरकत करण रो कार्यक्रम – ऊर्जा सुरक्षा, प्रौद्योगिकी अर दुनिया री दूजी चुनौतियां रा बारा मांय चर्चा व्हेला।
- भारत रो दूतावास इस्राइल अर ईरान बीचे बधती तणा-तणी ने ध्यान राखता थकां ईरान री राजधानी तेहरान ऊं भारत रा विद्यार्थियां ने हिफाजत सागे निकाल्या।
- केन्द्रीय मंत्री भूपेन्द्र यादव कह्यो-कुदरत ऊं घणो लेवणो आवता बगत सारू नुकसान दायक।
- राज्य मांय बेगी ई चौमासा री बिरखा सारू व्हेवण रा आसार-घणखर ठौड़ा चौमासा ऊं पैली री बिरखा।
- प्रदेश मांय योग शिविरां अर जागरूकता कार्यक्रमां रे मार्फत लोगां ऊं योग ऊं जुड़बा री अलख जगाई जा रही है।

000

प्रधानमंत्री नरेन्द्र मोदी रो आज कनाडा रा कनानास्किस मांय व्हे रह्या जी-7 शिखर सम्मेलन मांय सिरकत करण रो कार्यक्रम है। श्री मोदी आज कैलगरी पूग्या। वे ऊर्जा सुरक्षा, प्रौद्योगिकी, बुनियादी ढांचा अर निवेश ऊं जुड़ी चर्चा मांय सिरकत करेला। श्री मोदी लगातार छठी दफा जी-7 शिखर सम्मेलन मांय सिरकत कर रह्या है। सोशल मीडिया पोस्ट रे जरिये प्रधानमंत्री कह्यो के वे कनाडा रा प्रधानमंत्री मार्क कार्नी समेत कई नेतावां सागे मुलाकात करेला। भारत अर कनाडा रा रिश्ता मांय कारोबार, निवेश अर भारत रा विद्यार्थियां रा खास मुद्दा है। दुनिया मांय भारत रा प्रवासी रहवास सारू कनाडा ने घणो पसंद करे है। प्रधानमंत्री मोदी रो काल क्रोएशिया री राजधानी ज़ागरेब पूगण रो कार्यक्रम है।

000

ईरान मांय भारत रो दूतावास वठे पढ़ाई करण वाळा भारत रा विद्यार्थियां ने हिफाजत ऊं जुड़्या हालात ने ध्यान राखता थकां राजधानी तेहरान ऊं बाहर भेज दीना है। विदेश मंत्रालय रे मुजब ज्यां कने आवण जावण री खुद री व्यवस्था है, वां ने ई तनाव रा हालात ने देखता थकां शहर ऊं बाहर जावण बाबत कही ज्यो है। भारत रा कुछ लोगां ने आर्मेनिया रे गेले ईरान ऊं बाहर निकलबा रो सुबीतो मुहैया करायो जा रह्यो है। विदेश मंत्रालय भारत रा नागरिकां री मदद सारू 24 घंटा काम करण वाळो कंट्रोल रूम बणायो है। ई सागे ई मुफ्त नम्बर 1800 118 797 अर 91-11-23 01 21 13 ई जारी करी ज्यो है। ई बीचे मध्य-पूर्व मांय बधती तणा-तणी बीचे जी-7 समूह रा नेता एक भेळो बयान जारी कर र जनता री हिफाजत माथे ज़ोर दीनो है।

000

आज विश्व मरुस्थलीकरण अर सूखा रोकथाम दिवस है। ओ दिन ज़मी ने खाण्डी व्हेवण ऊं रोकण रा मकसद ऊं पूरी दुनिया मांय मनायो जावे है। ई मौके केन्द्रीय पर्यावरण, वन अर जलवायु परिवर्तन मंत्री भूपेन्द्र यादव जोधपुर रा शुष्क वन अनुसंधान संस्थान, आफरी मांय मरुस्थलीकरण तथा सूखा निरोधक रणनीतियों पर राष्ट्रीय कार्यशाला रा

उदघाटन सत्र मांय कह्यो के विकास सारु कुदरत ने हद ऊं बत्ती काम लेवण ऊं धरती रो तापमान बध रह्यो है। वे कुदरती साधनां ने काम लेवण सागे कुदरत ने बचावण माथे ध्यान देवण री अपील कीनी।

000

कार्यशाला मांय केंद्रीय संस्कृति अर पर्यटन मंत्री गजेन्द्र सिंह शेखावत कह्यो के राज्य रा आतूणी हलकां मांय पीढी दर पीढी पर्यावरण ने बचावण री सीख दी जावे है। वे कह्यो के विज्ञान सागे कुदरत रो संतुलन बणायो राखणो व्हेला अर ई सारु लोगां ने खुद जिम्मेदारी लेवणी व्हेला। शेखावत कह्यो के भारत दुनिया मांय ज़मीं हेटे ऊं सब ऊं बत्तो पाणी निकाळबा वाळो देश है। ऐड़ा हालात मांय पाणी बचावण रा काम ने जनता रो आन्दोलन बणावण री ज़रूरत है।

000

केन्द्रीय सड़क परिवहन अर राजमार्ग मंत्रालय पाली जिला मांय सड़कां बणावण सारु 128 करोड़ रुपया ऊं बत्ती रकम मंजूर कीनी है। सेन्ट्रल रोड इन्फ्रास्ट्रक्चर फण्ड रा तैत दी जावण वाळी ई रकम ऊं सुमेरपुर अर बाली हलका मांय सड़कां बणायी जावेला। ई काम माथे करीब 36 करोड़ रुपया खर्च व्हेला। जिला मांय सड़कां री मरम्मत अर चौड़ी बणावण सारु 62 करोड़ रुपया खर्च कर्या जावेला।

000

राज्य मांय आवता एक-दो दिन मांय चौमासा री बिरखा सरु व्हेवण रा आसार है। मौसम विभाग रे मुजब गुजरात अर आरे-सारे रा हलका माथे बण्या कम दबाव रा क्षेत्र रे कारण राज्य रा लंकाऊ हलका रे गेले चौमासा री बिरखा सरु व्हेवण बाबत् हालात अनुकूल है। राज्य मांय घणखर ठौड़ां काल हल्की ऊं मझला दर्जा री बिरखा री संभावना है जदके आवता 4-5 दिन मांय उदयपुर अर कोटा संभाग मांय कठे-कठे भारी बारिश रा आसार है। ई बीच आज करौली, बाड़मेर, जैसलमेर, पाली, झालावाड़ अर चूरु मांय कठे-कठे चोखो मेह बरस्यो। भरतपुर मांय दोपहरां पाछे तेज अंधड़ सागे व्ही बिरखा ऊं केई ठौड़ां टीन-टप्पर उड़ गया अर होर्डिंग्स पड़ गया। डीग मांय ई मेह रा समाचार है। म्हाणी हनुमानगढ़ खबरनवीस बतायो के तेज बिरखा रे कारण केई ठौड़ां पाणी भर ग्यो।

000

लारला चौबीस घंटां मांय राज्य मांय केई ठौड़ां चोखो मेह बरस्यो। सब ऊं बत्तो साढे 7 सेंटीमीटर पाणी सीकर मांय बरस्यो।

000

अंतर्राष्ट्रीय योग दिवस रा सिलसिला मांय नई दिल्ली रा मोरारजी देसाई राष्ट्रीय योग संस्थान मांय आज योग बंधन कार्यक्रम राख्यी ज्यो। कार्यक्रम मांय डेनमार्क, इंडोनेशिया, मलेशिया, दक्षिण कोरिया अर अर्जेन्टीना समेत न्यारा-न्यारा देशा रा नुमाइन्दा सिरकत कीनी। ओ ई साल योग दिवस रा सिलसिला मांय राख्यी ज्या दस खास कार्यक्रमां मांय शामिल है। ई मौके आयुष मंत्रालय रा सचिव वैद्य राजेश कोटेचा कह्यो के न्यारा-न्यारा देशा रा अ नुमाइन्दा भारत री पांच दिन री यात्रा रे दौरान अंतर्राष्ट्रीय योग दिवस रा जळसा व्हेवण री खास ठौड़ां रो दौरा ई करेला। प्रदेश मांय ई योग शिविर अर सामूहिक योगाभ्यास कार्यक्रम लगातार चाल रह्या है। आज जयपुर मांय मुख्यमंत्री रा रहवास माथे विशेष योग सत्र राख्यी ज्यो। इण मांय मुख्यमंत्री भजन लाल शर्मा विद्यार्थियां अर सुरक्षा कर्मचारियां सागे योगाभ्यास कीनो। अजमेर, पाली और झालावाड़ मांय ई अंतर्राष्ट्रीय योग दिवस काउंटडाउन रा तैत न्यारी-न्यारी ठौड़ां योगाभ्यास रा कार्यक्रम राख्यी ज्या। सरहदी जिला जैसलमेर ऊं म्हाणा खबरनवीस बतायो के बी.एस.एफ. रा जवान रेतीले धोरां माथे योगासन कीना।

000

अंतर्राष्ट्रीय योग दिवस रा सिलसिला मांय आकाशवाणी जयपुर रा क्षेत्रीय समाचार एकांश री ओर ऊं संदेश श्रृंखला चला र योग ने रोज़मर्रा रो हिस्सो बणावण री प्रेरणा दी जा रही है ।

000

हज 2025 रा मुकद्दस सफ़र माथे गया हाज़ी पाछा आवण लाग्या है । हाजियां ने ले र पहली उड़ान आज संवारे जयपुर अन्तर्राष्ट्रीय हवाई अड्डा माथे उतरी । राजस्थान हज कमेटी रे मुजब 28 जून तांई 17 उड़ानां रे ज़रिये हाजियां री वापसी व्हेला । प्रदेश ऊं ई दफ़ा 3 हजार 408 यात्री हज सारू गया हा ।

000

भ्रष्टाचार निरोधक ब्यूरो री टीम कोटपूतली-बहरोड ज़िला री पावटा-प्रागपुरा नगरपालिका रा अधिशाषी अधिकारी रा रहवास अर दूजा ठिकाणां री तलाशी लीनी । ईओ रे खिलाफ ओहदा रो बेजा इस्तमाल करण अर आमदनी ऊं बत्ती संपत्ति व्हेवण रा आरोप पाछे आ कार्यवाही करी ज्यी । ऑपरेशन मनी मिनिटिंग री कार्रवाई मांय आरोपित अहलकार कने केई प्लैट अर प्लॉट व्हेवण री ठा पड़ी है ।

000